

PORI MA KAN DÁDASÍEN KORINÍ NANIN BANTA UVAMAN AMEIN BOMPON MINO

(2 Korini)

Kan Dádasí En Ma Korini Uvanteí Pákena Afova Vaya Ino

Ma vompon ma uvantein banta ino.

Bayá varen orin banta Pori ino.

Uvarein orana ino.

AD fifti-sevenifin mino. Esé bompon uvádan manáá viyon orivin mai oyampákéi ma vompon uvanten mino.

Ma vompon ma uvantein baru ino.

Kiriki varafin bain baru Masedoniá ino. Taitasi ma Koriní me ampiren ma evaránen ovan mi uvaren mino.

Ma vompon ma uvaman amikhein kéká ino.

Koriní barurá ma monó tiyan mumunan iyain nanin bantafin mino.

Nái ana vará ma vompon uvanten nafino.

Koriní baru ráké kampun afova amin banta kayo ano Porini vaya varen orin doran má pura sikhein kama vaya ma sian dákó iyain ma san ma uman amiyan nan mino. Pori vei yoran má Yisasini kama vaya ma siamiyain ma san mi esé araí in ai (sapta) kayofin ákonaen tian amá ukhen mino. Yerusalemí ma monó tiyain nanin banta ma ayain moní ma karú darú in má inká Taitasi ma Koriniké ovaránen erin nain damu san ma sikhei páken nan sapta eiti vá naini vápin tikhen mino. Monó nanin banta vá ma ará manafín in avúavákái Pori orikhen mino. Sapta teni (10) fin amen avaya ano manáá mo enará ukhen mino. Sapta

teni (10) ráké tetini (13) fin ma orikhein mai manáa nanin banta ano ma ída ará baeran báken Porin uman amiyan ará namu uantiyan baya ino.

Porini Amusin Baya Ino

1 ¹Yisas Karaisini kama vaya varen mo vanasi siamino van ma Tiyarafenu ano vei anunurá tivíká ein banta séi Porin má inká tetisi kama sifá tiváe Timotin má anon ma vompon uvaré uno.

Mai ma Koriní barurá baona monó nanin banta kayo vá inká Ákaiá barafin má ma mumunan kéká baonafái uvamádékun oren mino.

² Teti Sifóe Tiyarafenu vá inká Bafan Yisas Karaisini sarisari vá ará kusin má ano siretin má banten mino.

Tiyarafenu Ano Ma Minó Nanin Banta Ará Kusiantein Baya Ino

^{3a}Tetisi Bafan Yisas Karaisin Afóe Ayarafenun avisá daní ó tifano. Mai véi anon tetin nan arunan uren kusin timé iyan mino. ⁴Teti ma umampin oré tifé kun ma véi setin kama uren kusin timé iyainí esá ena nanin banta ma umampin orintí maé kamaé aya ékun ná kusin barano. ^{5b}Mai fara vara seyo, Yisasi ma vareiní ukhein uman ma seti variyaruna van mi Tiyarafenu ano Yisasin pinté uaren tetin moékan arunan é iyan mino. ⁶Máan tiyantí tetí ma uman baranuna anon tiretin ará kusiantantin Tiyarafenu ano siretin kanaíen aya uren evaránen aviranten mino. Mai fara vara seyo, Tiyarafenu ano ma setin tirá kusisintan nain manon tiretin ará ákona uantanten mino. Máan ma urantiyan bempáké báke mai ma setí ankan bariyarunaí ukhein uman baran nono. ⁷Tetí ankan ma ákonaé iniyaruna mai ma seti variyarunaí ukhein uman ma siredí ankan má dere varesin maen Tiyarafenu ano siretin máí ará kusin aminten mino.

^{8c}Mumunan tiyofi sifá tiváeyan noe, Esiá barafin ma setin timaniná afoká ukhá ein uman afová ono van muno. Kákan uman urói afoká uven tetisi ákona maman bararasí uraká tetí ankan puronté uno sé inikhá uno. ⁹Pura ino. Tetí ankan purimpin tisintákaren mifo mai yaná ma yákó ein nan ída setisi ákonará ino sé iné tifanté umpo füká ein ma evaránen avían manté iyain mai Tiyarafenu ákonará ino sé uno. ^{10d}Tiyarafenu ano furin pintena setin tiya uren tivíkein béisí ano anan ena ena setin tiya uriyan tiviranten ne sé iniyá ave ukheruna mai yaná afoká inten mino. ¹¹Tireti ankan ma setin tiyae amúkeona vá inká kokhon nanin banta ano ma amúkein máí Tiyarafenu ano iniren mi setin tarisari uren tiya ukhein kokhon nanin banta ano setin too varen béisí tusu siantanten mino.

Pori Ma Orono Sikhá Ein Nan Ma Sirun Noe Sein Baya Ino

¹²Máan tukhein nan mi setiyan timo siyá uno. Teti ma siredí ankan má báké ma siredimpin má inká ena nanin bantafin má ma yoriyá eruna mai

^a 1:3 Rom 15:5 ^b 1:5 Íbo 34:19 ^c 1:8 Apo 19:23; 1Ko 15:32 ^d 1:10 2Ti 4:18

fura sen puntákein inin má avúavá bá ma Tiyarafenu ano simikheintái yoriyaré uno. Ena nanin banta vá tiretí ankampin má ma yoriyaré eruna mai ída setisi ákonará ifo Tiyarafenui sarisarirá ino. ¹³Tiretí ankan ma kasae yankáde afová oren bompon mi séi uvaman amiyaruna manáa yamú ma oriyantiyan teti ma siamiyaruna vaya oman afova suron inono. ¹⁴^eTaréa setinti vaya ana manáan afová iyaona ínaimpáké minó afova ureya Bafan Yisasi ma ovaránen erin nain damuí sretin ma amo siyarunaí eya setin timo sin nono.

¹⁵Mai fara vara seyo, sretí ankan nare o ódékuya kan dádasí e avu varano van mi sirá mantiyá inikhé uno. ¹⁶^fTéi ma inikheruna mai Masedoniá barafá ma oronté tiretin e oné orikharé ma ovaráné erenté maé tiretin má e vakuya mai ráké aaí usintesí Yudiá barafá oronté uno.

¹⁷Ma vaya ma sian damuáderuna van tiretí ankan ten nan ineine uren ifá inten minó té iniya rafono. Ída ino. Mai ma vara ráke nanin banta ano ma vaya sian damiyan ma varanté uno sen inká ída varanté uno sen uren ma mai yaná kasaen bariyainisá iya rafuno. Ída ino.

¹⁸Tiyarafenu ano minó bei vaya ánain mi yakhafé iyain bantí pasé máan manan onté uno. Téi fura siré tiretin tiamiyá uno. Téi ma siyaruna vaya kayo mai séi ma varanuna yana san mi fura sé tiyá uno. ¹⁹^gMai fara vara seyo, Tiyarafenu Anin Yisas Karaisini vaya gefái sen má Sairasin má inká Timotin má ano siamiyáké béimpin eyo sin manan ban mifo mai ma arakhéké iyan ída ino ma sin má eyo ma sin má béimpin ída vane séku inikha ono. ²⁰^hMai fara vara seyo, Tiyarafenu ano ma iyáantan baya kokhon uron mi varé íkan Yisasi ano mai vaya kayo me kanaí ukhen mino. Máan tukhein nan mi setí ankan mai véin pinté uaré pura ino siyáké maé Tiyarafenu aví daní é iyá tiféuno. ²¹Mai van mi Tiyarafenu ano setin má inká tiretí ankan má aní uren mi setin ákona simiká Yisasin má manafin báké mantaan ákona ukhé tiféuno. ²²ⁱMáan tukhékun pasen kokhon daná ma setin timeno van ma kaúdákein pintena Kantá Aunan pói araíen aní daná tetin túpin kain eravíkan tetin maman bei vanasií ukhen mino.

Pori Ma Ída Ainen Evaránen Koriní Barufá Orein Baya Ino

²³Tiyarafenu ano séin afová ukhái furan tiyá uno. Tiretin uman amenaen tiré Koriní barufá ída ainé evaráné oré uno. ²⁴^jTiretin amusin ameno van mi sretin má doriyá umpsí ída sretíi mumunantá dafisintó uno. Para vara seyo, mumunampin gefái mantaan ákona ukha rono.

2 ¹^kMai van mi séi ovaré me iniré ída vá betin ena vá mo uman amékun aú arun barano sé iniréi ifá é uno. ²Mai fara vara seyo, séi

^e 1:14 2Ko 5:12; Fir 2:16 ^f 1:16 1Ko 16:5-6 ^g 1:19 Apo 18:5 ^h 1:20 Rev 3:14

ⁱ 1:22 2Ko 5:5; Efe 1:13-14 ^j 1:24 1Pi 5:3 ^k 2:1 1Ko 4:21

ma saretin uman amirékun ma arunanápin basin maen mai ena intéa kékasá bain ná téin timusin timinten nafino. Ída ino. Tireti anan ba ono. ³Mai van mi gefá ma yékun orein bompopmin máa sé uvantaré uno. Téi ma orékun maen mai ma séin moékantá amusin timiyain kéká ano ída vá tirun naná timino sikharé umpsó séi ma inikheruna mai sempin ma vain timusin tireti ankan má dere varano van muno. ⁴^lTiretin nan kákán tirunaná bariyáké ifí pintéi mai vompon uvaré uno. Tireti ankan arunaná amen novara ma vompon uvare raumpo séi ma saretin nan moékantá tinunu iyaruna mai afová ono van muno.

Ena Nanin Bantai Ume Ma Ampiantan Baya Ino

⁵Mana vanta ano ma e mantén tireti ankan uman amintiya ma arunanápin basí mai uman téi ída varanté umpsó monó nanin banta ma amikhein uman mai manáa sesosikhái séi ída kanaí é kokhon bayá senté uno. ⁶Máan turaya ma kokhon mano mai uman daíde ma mai vanta ameona uman mai kanaí ukhen mino. ⁷Máan tukhein nará mai vanta enádá ída uman ame vá beni ume ampiancédea kama e ayaesin ná ída arunanápin báken amusin ná ino. ⁸Máan ture véin aní eya en nan para sinunu iyá uno vá tenovan mi éin duvuniyá uno. ⁹Éi intesá é tenti vaya iniré bákurinte fono van mi mai vompon uvaman amé uno. ¹⁰Éi ma mana vantai ume ampiantesi maé inte uman ná béri mantaren nafi mai séi yere veni ume ampiantanté uno. Tiretin naren tiré Yisas Karaisin avorá máan tonté uno. ¹¹^mMáan tékun Ban Anon mano ída kanaíen tetin akhenóka intí eravé tinkamó tifano van muno. Para vara seyo, veni namu avúavá pefái seti afová ukhé tiféuno.

Auyen Kasen Ban Avúavái Yoran Banta Kékái Vaya Ino

¹²ⁿTroasí barurá ma Karaisini kama vaya seno van ma oriyá bá o onékun maen Bafan mano gefái senti aa uvíádan baren mino. ¹³^oMáan tukhan mifo mairá ma kusen ban nan ída sinunu ukharé uno. Mai fara vara seyo, se sisá tiváe Taitasin ída onté pasé betin nan me sirun noe siré bérin nan dosintó Masédoniá oré uno.

¹⁴Máan tukhantí tetí ankan Tiyarafenu vará tusu sian tátifano. Mai fara vara seyo, Tiyarafenu anon Yisas Karaisin pinté uaren tetin tiyá minó danápin esanté iyá uno. Tiyarafenu anon tiyá Yisas Karaisin pákena afova vaya minó akhempá tiyákun kama uveri aunka ma orera einíi iyan mino. ¹⁵Mai fara vara seyo, inarufá orin aintá manta ma inká aron i van masípin orin aintá manta ma ukhein kayofin tetí ankan aunka uveri an mi yakhé tiféku Yisas Karaisi ano setin máden íkun uan Tiyarafenun amiyan mino. ¹⁶^pMai ma inarufá orin aintá ma mantakhein kayo ma aunan amin uveri

^l 2:4 Apo 20:31 ^m 2:11 Ruk 22:31 ⁿ 2:12 Apo 14:27; 1Ko 16:9 ^o 2:13 Apo 20:1

^p 2:16 Ruk 2:34; 2Ko 3:5-6

ano ma kama aunka einí ukhé tifé umpo mai ma verai siyan ban barufin ma orin aintá ma mantakhein kayofin namu aunka ma iyain uveri an mi yakhé tiféuno. Iye anó mai avúavápín kanaí inten nafino. Ída ino. ¹⁷Máan tukhéi setí ankan ona ma mamáken miyaní ino van me khoe khoe en noin kayo an ída yakhé tiféuno. Moní barano siren ma monó ten noin kayo kokhon mi van mino. Tetí ankan Yisas Karaisi yafíká ben avorá pura sen puntákein avúavákái Tiyarafenu vaya sé nó tiféuno.

Aposeri Kéká Mai Auyen Kasen Ban Avúavái Yoran Banta Kayo Ino

3 ¹Araíerá téi kamaé puntáké doriyá unó terá evaráné te simo siya rafuno. Ída ino. Tetí ankan manáa kéká an derá tetí siví daní ono van ena vanta kayo ano uvamádein bompon ná amiya rafu áá saretí ankan mano máan ukhein bompon uvamádesin tetin tiyaino vará iya rafuno. Ída uron mino. ²Tiretí ankan manan tetisi vompon bákeya súká uvanten nan minó nanin banta ano mai vompon mi yankáden afová é iyan mino. ³Tetí ankan ma yoriyaruna yoran manon aníen Karaisin pinté erikhein bompon mino siyan mino. Mai vompon maen ída vompon dankafó uvanten mifo fara van oriyan ban Tiyarafenu Kantá Aunan pói uvanten mino. Onámaná daro sa uvanten naifo vanasi aúkái uvanten mino. ⁴Yisas Karaisin pinté uaren mi Tiyarafenu ano setin tiyái mai yorarí iyái ventá anan ákona inin kaúké tiféuno. ⁵Ída setisi ákonarái mai yoran doriyá tiféuno siré tetí siví daní otifanté umpo Tiyarafenu finté anan mai ákona eré iyan mino. ⁶Máan tukhan Tiyarafenu anon tivíadá auyen avúavápín ma kasen ban doran bantaí ukhé tiféuno. Peyante man baya ano ída kanaíen ayun ma fara van oriyan ban aunan timinten mifo mai ma auyen kasen ban avúavákái Kantá Aunan mano ayun ma fara van oriyan ban aunan timikhen mino.

Auyen Kasen Bani Kakhan Ákona Ino

⁷"Mosesini Man Baya ma onámanáká uvantaré ein mai kama aa sákéi amikharen mifo mai ano furin manan dákkó iyaren mino. Mai man baya ano Tiyarafenu kakhan mái eríkan Mosesin auná pinté panu uron tiyákan Isarerí nanin banta ano ída kanaíen ben auná onen mifo mai kakhan mano ainen mo kípen mino. ⁸Máan tukhen mifo saréa ma Kantá Aunan mano yoriyain khakhan mano ídá moéken esantakhen nafino. ⁹"Banta ma aruan purin daná ano ma kakhan baren erikharé intin ma inká auyen avúavápín kasen ban mano ma setin nan puntákein nanin banta ino ma sikhein panu anon moékakhen mino. ¹⁰Máan tukhein nan mi auyen kakhan manon pura sen peyante kakhan esantakhen mino.

^q 3:1 Apo 18:27; 2Ko 5:12 ^r 3:2 1Ko 9:2 ^s 3:3 Eks 24:12; Yer 31:33; Isi 36:26-27

^t 3:6 Yer 31:31; Yon 6:63; 1Ko 11:25 ^u 3:7 Eks 34:29 ^v 3:9 Diu 27:26; Rom 1:17

11 Para vara seyo, feyante avúavá ano ainen kípan kakhan mái erikharen mifo auyen avúavá anon moékan kakhan má para van oriyan banten mino.

12 Máan tukhein nan mi setisi ákona inin mairá kaúdákéi ída feran kasaé baya siyá uno. 13 ^wMáan tukhantí tetí ankan ída Mosesin an dé mai ma ve aunápin panu siyan ma Isarerí kayo ano onan nae siaren ma yavaráe fóké iyareiní ó tifanté uno. 14 Máan tukhan taréa yere feyante Man Baya yankafiyán mifo mai ma gefá iyákaré ein davaráe ano vetí ankani inintá para iyákan ída kanaén beni ana afová iyan mino. Yisas Karaisintá ma mumunan intin manan mai ma iyákein davaráe yo varanten mino. 15 Máan tukhan taréa yere Mosesini Man Baya ma yankafiyán maen mai ma iyákaré ein davaráe ano vetí inintá para iyákan pasen beni ana ída kanaén afová iyan mino.

16 ^xMáan té iyan mifo Bafantá ma ará baéden mumunan inain kékái ineinerá ma iyákaré inain davaráe Tiyarafenu ano yo varanten mino. 17 ^yMáan tinten mifo Bafan maen Aunan mi váken pasen interasá Beni Aunan ban nafi mairái kusin amé iyan mino. 18 Máan tiyain nan mi mai yavaráe ano ída setin tunáká iyákein Bafani kakhan mano setimpin eriaren kamu finté ma mo fanu seinén ena nanin banta fanu siantanten mino. Bafani Aunan mano setimpin bempáké erirú iyan tetin maman béis an darantin beni kakhan mano setimpin bíkaaren ena nanin banta mo fanu siantanten mino.

Bara Khavefin Ma Kama Yanasinta Vain Baya Ino

4 1 Máan tukhein nan mi Tiyarafenu ano vei arunaná pinté uaren ma yoran timikhái ída sivesara iyá tiféuno. 2 ^zMáan tukhái setí ankan betin ayave amin avúavá ída variyá inká ída auráré iyá tiféuno. Tetí ankan ída ena nanin banta máká maáká iyáké inká Tiyarafenu vaya ída ovaédé tiyá tiféuno. Tetí ankan Tiyarafenu avorá puntákein baya anan tiyá tifékun mi kama ineine ma vain kéká anon pura sen afová iyan mino.

3 Máan tukhen mifo seti ma kama vaya siyaruna ano inte kayo avorasá davaráe ano ma iyareiní iyan nafi mai o afeyoran nain kékái váká tetí afová ukhé tiféuno. 4 ^aMa vara ráke Ban Anon mano vetí ankani inintá dasirádan pasen Kama Vayai ákona kakhan ída oniyan mino. Yisas Karaisi ma Tiyarafenu aman manon báká ma veni ákona kakhan nan ma siyaruna van ída iniyan mino. 5 Mai fara vara seyo, setisi sivútivá pákena va siamé nó tífe raumpo Yisas Karaisi ma setisi Bafan bain mai véin páken nan tiamiyá tiféuno. Inká béis ma setin tiya ukhein nan mi

^w 3:13 Eks 34:33 ^x 3:16 Eks 34:34 ^y 3:17 Yon 8:36; Rom 8:2 ^z 4:2 2Ko 2:17; 1Te 2:5

^a 4:4 Efe 2:2; Kor 1:15; Ibu 1:3

siretin ayain kékái vá tiféuno. ⁶^bMai fara vara seyo, gefá ma ma varafin titípa ukháin ma kakhan afoká ino síkan ma afoká ein Tiyarafenu anon tetin túpin kakhasintái nó tiféuno. Mai khakhan manon tetinti inin amá usintái Yisas Karaisin pinté uaré Tiyarafenui ákona kakhan oniyá tiféuno.

⁷^cMáan tukhen mifo mai ma ainen duvé iyain bara khave kayo an mi setí ankan dakhé tifékun mi Tiyarafenui kakhan mano ma setimpin bain manon kama yanasantia ma vara khave kayofin bainí ukhen mino. Máan tukhan mi setin pinté uaren aní ino van mi Tiyarafenu finté mai kakhan ákona ano erikhen mifo ída setin pinté erikhen mino. ⁸^dMáan tukhan minó akhen pákeí ara ara uman mano setin timaniná afoká iyan mifo mai ano setin ída maman bararasí iyan mino. Máan tiyan mai ano setinti inin máden asuse iyan mifo ída ifá iyá tiféuno. ⁹Namuro kayo ano setin timaniná ara ara uman kaé é iyan mifo Tiyarafenu ano ída setin oyan timé iyan mino. Tetin tiruren namu urá maé e mantaaré para yoré oriyá tiféuno. ¹⁰^eYisas Karaisi ma vareiní ukhein aí bá uman má ma variyá tiferuna anon béis ma evaránen e mantakhein ákona aníin oniyan mino. ¹¹^fMai fara vara seyo, seti ma ayun para vá tiferuna nanin banta ano ma Yisasin ánain bákuriyaruna van mi furin uman tetin timaniná kaiyan mino. Máan ma inain manoi setinti yan bukhafa fintena Yisasini avúavá onanten mino. ¹²Máan tukhein nan mi seti ma furin uman bariyá tiferuna anoi siretimpin ayun ma fara van aunan afoká uantiyan mino.

¹³Máan tiyan mai van mi Í Bompompin pefá máa sikharen mino.
“Tiyarafenu rái mumunan iyáké tiyá uno.” *Íbo 116:10*
Máan ma sikhá einí É tetí ankan deren mai manaí mumunan mái vá mai vaya kasaé tiyá uno. ¹⁴^gMai fara vara seyo, Yisasi ma fukaréin avían mantein Tiyarafenu anon béin má tetin tiván mantarantíi siretí ankan má manafin ben avorá o mantanté afová ukhé tiféuno. ¹⁵Mai yanasantia ma setin turá afoká iyain mai siretí ankan aya ino van mino. Tiyarafenui sarisari ano kokhon nanin banta avíadantin Karaisi vaípá eriven béin aví moékantá daní intin khakhan ákona ano véimpin bíkaaren avan inten mino.

Ákona Yorarí In Baya Ino

¹⁶^hMai van mi setí ankan ída ifá onté tiféuno. Setinti yan bukhafa finté ákona kípé iyan mifo minó damú Kantá Aunan manon túpin evaránen auyen ákona simé iyan mino. ¹⁷ⁱMai fara vara seyo, saréa seso sikhein uman mi variyá tife umpsínaímpáké para van oriyán ban kakhan mi siminten mino. ¹⁸^jMáan tintéíi saréa ma uman bariyá tiferuna van ída iniyá uno. Para vara seyo, seti ma oniyá tiferuna mai ída ayáká ban uman

^b 4:6 Esé 1:3; Ais 9:2; 2Ko 3:18 ^c 4:7 2Ko 5:1 ^d 4:8 2Ko 1:8; 7:5 ^e 4:10 1Ko 15:31

^f 4:11 Rom 8:36 ^g 4:14 1Ko 6:14 ^h 4:16 Efe 3:16 ⁱ 4:17 Rom 8:17-18 ^j 4:18 Kor 1:16

mifo mai ma fara van oriyan ban danasinta ma ída onté tiferuna ano ma simusin timin nain nan mi saréa inikhé tiféuno.

Tiyarafenu Ano Ma Fara Van Oriyan Ban Bukhafa Simin Nain Baya Ino

5 ¹^kMai fara vara seyo, ma varará ma yavaráe namun uvantáin ma varákiyain an mi setin tu ano yakhá afová ukhé tiferuna furé maé ma vararái ma vukhafa me ampé tifanté uno. Máan tuvintin maen para van oriyan ban bukhafa ma Tiyarafenu ano veyantá uvantein timídantíi inarufá o vá tifanté uno. ²^lMáan tukhein nan mi inaruráke vukhafafó auí daná ma usinteiní ino van mi ma vara ráke vukhafafó berai siyá tiféuno. ³Mai fara vara seyo, inaru ráke vukhafa ma usintádantí maé ída sivápa vátifékun onanten mino. ⁴Para vara seyo ma vara ráke vukhafafin ma váké berai siyá umpo ma vukhafa ída vantí bano vara siya rauno. Ída ino. Inaru ráke auyen bukhafa mamarékun mai ano ona an davintin mai vukhafa ano ída furinton para vano van mi siyá uno. ⁵Tiyarafenu ano mai anarái setin uváden mi mai ma kama yanásinta ma iyátintákein ma ínaimpáké timin nain mi aníen Kantá Aunan timikhen mino. ⁶^mMai vukhafafin ma vá tiferuna anon Bafani varufin ben má ída vátifé umpo mai ma iyátintákein danasinta anon ena ena setin tirá ákona usintiyá mai seti afová ukhé tiféuno. ⁷Máan tiyain nan mi setí ankan mumunantái vátifé umpo suufó ma onan tasa ino. Ída ino. ⁸ⁿMáan tukhá ma vukhafa me ampiré Bafani varufin ben má o vá tifano van moéké tinunu ukhéi mai van ákonaé iniyá tiféuno. ⁹^oMai van mi ma vukhafafin má inká ena vukafafin má ma vanté maé mai véin ma amusin amin inin onan masá bá tifano. ¹⁰Mai fara vara seyo, minó anon Yisasini yaimin karáká oré tifékun maen teti ma mai vukhafa vá báké ma kama yana safi namu yana safi ma variyá ótifuluna avúavákai miyan timídú inten mino.

Tetí Ankan Tiyarafenu Ará Manafiní In Baya Ma Vanasi Siamin Baya Ino

¹¹Máan tukhein nan mi setí ankan Tiyarafenu van péde ben aránaópá bákéi véintá mumunan ino van banasi ákonaé tiamiyá uno. Mai yorarí ma iyaruna mai Tiyarafenu ano fefá afová ukhái mai sretin má dere afová ono van mi ákonaé iniyá uno. ¹²Máa senuna van tetin nan puntákein banta kéká ino sireya simo seno vara ma vompon uvaman amiya rauno. Ída ino. Tetisi sivútiva san amusin ureya mai ma yan bukhafará ana oniyá ma súkáké Tiyarafenu funtákein avúavá ma variyaruna kéka san ma soyampá bayá siyain kaylorá dafían ákona ono van mi siyamiyá uno. ¹³Onesí ma óen áen ma iyáku mae mai Tiyarafenu ano kákan bí barano van mumpo inká onesí ma funtákein inin ma

^k 5:1 2Ko 4:7 ^l 5:2 Rom 8:23 ^m 5:6 Ibu 11:13-16 ⁿ 5:8 Fir 1:23 ^o 5:9 Kor 1:10; 1Te 4:1

variýáku mae mai siretin nan mi iniré máan tiyá uno. ¹⁴Mai fara vara seyo, Karaisini avábá anon tetin tirá mantarái siretin nan inire mumunan ono van mi siamiyá uno. Mai ma Yisasi ma minó nanin bantai ume van púkein nan mi setí ankan dere fúaré e mantakhé uno sé mumunan iyá tiféuno. ¹⁵^pMinó nanin banta van mi véi fúken mifo aun ma vandin ban nain kayo ano veyan nan ída vá inin naifo mai ma vedin nan e fúaren ma e mantakhein banta van mana vá inino.

¹⁶Máan tukhein nan mi ma vara ráké avúavápó banasii avúavá taréa ída yaimiyá tiféuno. Pura ino. Pefá maé barará avúavápó Karaisíni avúavá daimiyá tifé umpo saréa ída ino. ¹⁷^qMáan tukhein nan mi mana ano ma Yisasin má o súpá inten maen béis auyenfi inten mino. Beni feyante avúavá ano e kípavintin auyen avúavá bái vanten mino.

¹⁸^rKaraisi ma varein avúavá kái Tiyarafenu ano setin evaránen tivíden mi auyen avúava sintia simiren inká ena nanin banta ma o avían dantin ma véin má ará manafiní in doran tetin timikhen mino. ¹⁹^sMai fara vara seyo, Tiyarafenu ano Karaispin báken mi minó nanin banta vá ma manafin kusen ban aa uví dáken pasen taréa ída vanasii ume yankáden uman amiyan mino. Máan tukhein nan mi vanasi ma o avían béis amin doran mi setin timikhen mino. ²⁰Tetí ankan Karaisini oo vanta kékái vákun Tiyarafenu ano setin pintéi uaren tiretin baya siamiyan mino. Tiyarafenu vá manafin kuse vano van mi Karaisin oo varé tiretin tútúpé ariyá uno. ²¹^tKaraisi maen ída ume van banta ifo setin tiya ino siren mi Tiyarafenu ano setinti namu avúavá maman Karaisin amaniná kaúdan mi íkun uan Tiyarafenun amikhein pasé béis pinté uaréi Tiyarafenu funtákein nanin bantaí ó tifanté uno.

6 ¹Tetí ankan Tiyarafenu vá manafin doriyákéi véi ma sarisari ukhein nan béis pákaan ákona ono van mi ínané tiamiyá uno. ²Para vara seyo, véi máa sikhen mino.

“Teyantá ma siretin avídé kama onuna yamú ma aní ukharé eruna yamú afoká íká
tiretíi ifí iniré aya é uno.”

Ais 49:8

Tiyarafenu ano ma siretin aya uren ma evaránen aviriayin damúi saréa vaono.

Pori Ma Uman Kayo Yosiá Ein Bayo Ino

³Banasi ano setisi yoran nan namu yorarén mino sin nain nan pasé mana nanin bantai inarufá orin aasá ída mana yaná maman iyariyá uno. ⁴Tetí ankan Tiyarafenu yoran banta kékái váké pasé kama avúavá anan ena nanin banta aní é iyá uno. Máan tiyáké maé tetin timaniná ma

^p 5:15 Rom 14:7-8 ^q 5:17 Rom 8:1; Kar 6:15 ^r 5:18 Rom 5:10 ^s 5:19 Rom 3:23-25

^t 5:21 Ibu 4:15

aau fi uman nafi ma afoká iyá maé mantaan mi ákona ukhé bá tiféuno. ⁵^wBanasí ano siruren karavusifin pákaan kaiyan inká namuro kayo ano sisiret tinkayan tiyá maé tetí ankan kákan uman uron bariyá maé ída kamaé tuun bariyá inká tirafan báé iyá uno. ⁶^xKantá Aunani ákona fókéi sirá kusin avúavá bá ena avábá in má inká kama ineine uren ma funtákein avúavá baran mái fákaráké doriyá uno. ⁷Tiyarafenu ákona ano setimpin bakái fura sikhein baya anan tiamiyá uno. Puntákein avúavá pói setisi siruvín danasí é inká tankoí é ukhé tiféuno. ⁸Manáa nanin banta ano sinkayan máden toyampá baya siren kampun doraríi iyan mino siyan maen inká manáa ano setin timo siren kama yoraríi iyan ne siren tetin tiví daní iyan mifo setí ankan Tiyarafenu yoran para yoré oriyá banté uno. ⁹^wBanasi ano ma ída afová ukhein banta an dakhé tifé umpo minó anon tetin afová ukhen mino. Purin mano setin pákiyan mifo ída furiyá tiféuno. Inká tetin tinkáden purin tirirí iyan mifo ída furiyá tiféuno. ¹⁰Tetisi sirun nanápín bá umpo ena ena yamú Tiyarafenu ano simusin manan timé iyan mino. Minó daná ída vá bá umpo ena nanin banta ayaékun inaru fáke kama yanásinta variyan mino. Inká ída mana yaná dékun ban mifo minó danái kanaí ukhé tiféuno.

¹¹Koriní ma vaona nanin banta oe, fura vayan tiretin tiamiyá pasé túkákéi saretin tirá amé tiféuno. ¹²Tiretin nan moéké tinunu iyái saretin ída sirá namu uantiyá umpo mai setin ará namu usintiya nái sirá ída manafiní ukhé tiféuno. ¹³^xTiretin ma sirá amerunaí eya vá tetin ará timeno van mi ve afóe ano ma ve akhafana siameiní éi saretin tiamiyá uno.

Ída Ma Mumunan Iyain Nanin Banta Vá Ma Ída Manafin Doran Baya Ino

¹⁴^yÍda ma monó tiyain kéká bá ída vá o súpá uveya yorarí ono. Mai fara vara seyo, funtákein avúavá bá namu avúavá bá ano ída manafin dorarí inten mino. Inká kakhan má titípa vá ano ída manafin túpá inten mino. ¹⁵Yisasin má Ban Anon má ano ída ará manafiní ukhein pasinti monó ma siyaona nanin banta ano ída kanaféya ída ma monó tiyain nanin banta vá o súpá uveya yoran nono. ¹⁶^zAyarafenu monó namun má kampun ayarafenu monó namun má kasaesá maman túpá ótifante rafuno. Ída ino. Mai fara vara seyo, aun ma fara van oriyá ban Tiyarafenu monó namun mi setí ankan báken pasen béri máa sikhen mino.

“Téi ano vetin má báké
betin aúbaná nó maé
Betíi Ayarafenu váken inká
tentí vanasin banten mino.”

Riv 26:12

^w 6:5 2Ko 11:23-27 ^v 6:6 1Ti 4:12 ^w 6:9 2Ko 4:10 ^x 6:13 1Ko 4:14 ^y 6:14 Efe 5:11

^z 6:16 1Ko 3:16; Yer 32:38; Isi 37:27

17 ^a“Máan tukhein nan mi Bafan mano siyáken
mai kéká me ampire nentá oriveya
vetíi fain danasinta ída aruvesirá
tiretin avirano sen mantino.”

Ais 52:11

18 ^b“Minó ákona ma vain Bafan mano máan mi sen mantino.
Tiretin Afóení éku mae inká ten tikhafanaí inono.”

2Sa 7:14

7 ¹Téi ma sinunu ukheruna sirona kéka soe, Tiyarafenu ano ma
amenté uno siren ma iyáantan baré ein danasinta inka varé tifé
umpo erisá dante vukhafa vá tú iyampon má ma fainín avúavá do sesé
uan karúdaré avusese uve sá ben nan mana feriyáké kantasí ukhein
avuavá ana vá bará tifano.

Koriní Nanin Banta Ano Ma Ará Baerein Nan Ma Pori Amusin Ein Baya Ino

²Tetí ankan ída mana vanta namu uanté, aré asé inká ena vanta
kampun tiré namu yanápin avían kaúké tifé umpo ara sá timeno. ³Ma ma
siyaruna mai siretin au finí in baya va siya rauno. Ída ino. Pefái siretin
tiamiyái setí purasé tükákéi siretin nan tinunu iyá uno séku inikha ono.
Mai van mi furonte rafu áa fá bante rafu mai avúavá anan bariyá banten
mino. ⁴Ara ara uman ma setin timaniná erí ma siretin nan ovaré me
iné kun maen mai anon tirá kusin timé iyan mino. Máan tiyain nan mi
sireti ankan nan kákan timusin uantiyákéi ma vaya siamiyá uno.

⁵^cMai fara vara seyo, Masedoniá barafá ma onóbé kun maen ara ara
vayafó tetin uman timíkan mai anon tikhokho fan tufá tivesaraen mino.
⁶Máan tiyákun mifo mai ma uman baren ará namuin ma ará kusin amé
iyain Ayarafenu ano ma Taitasin tiantan orein manon tirá kusin mo
simen mino. ⁷Taitasini erin mano ana va sirá kusin timen naino. Tiretí
ma véin má dere ará kusin amireya inká ten timaniná ma afoká ukhein
dana san ma arunan usintáde ma siretíi avábá ma aní eona van ma véi
me sisimein nan mi kákan timusin é uno.

⁸^dTenti vompon mano sireti ankan ará namu uantáken mifo mai van
ída sirá amé uno. Mai fara vara seyo, fefá tirun noe siyá umpo saréa
afová é ma vompon mano manáarái siretin ará namu uanten mino sé
iniyá uno. ⁹Mai vompon ma uvaman amiré kun ma ará namu eona rasa
saréa simusin iya raumpo Tiyarafenu anon mai ará uman maman dákó
en mino. Mai anon tiretíi ineine maman amá urayan ará baere ompo
setinti vaya ano ída uman amen mino. ¹⁰^eTiyarafenu anon ará uman
maman dákó uran mi mai ano setisi inin maman amá uren tiya íkái
sirá baédé kun evaránen tiviré iyan mino. Máan té iyan mifo mai ma ída

^a 6:17 Isi 20:34, 41; Rev 18:4 ^b 6:18 2Sa 7:8; Yer 31:9 ^c 7:5 2Ko 2:13 ^d 7:8 2Ko 2:4
^e 7:10 Mat 27:3-5; Ibu 12:16-17

aúkáké tirunoe sin aú baerarí ma ein nanin banta anon purin maman dákó é iyan mino. ¹¹Tiyarafenu ano ma mai arunaná maman dákó ein manon kama avúava sinta maman tiretin aúbaná dákóen mino. Mai avúava sinta maen ákona inin má doreya inká tiretiyan maman aní eya ída ume vane seja inká tiretí ankan ume van aranan iyáke akhokho van eya inká téin tonano van eya inká kama e yafíbe yoreya inká ena ma funtáde yaimin avúavá ma vareona ino. Mai avúavá ma eona anon aní eya siretimpin ída mana aau van minon te ono. ¹²Aau vanta fi áa auuí uantant banta fi funtarano vara séi mai vompon uvare rauno. Ída ino. Tiretií avúavá e unen dákó édavintiya Tiyarafenu avorá teti nan purase anunu ono van mi mai vompon uvaman amé uno. ¹³Tiretin ma setin nan anunu iyaona avúavá anon tetin tirá ákona usinté iyan mino.

Inká mai ma Taitasini ará uman ma maman kusiantádeya ma véin amusin ameona avúavá bá ano yeren tetin kákan timusin timen mino. ¹⁴Tiretií kama avúava san amo sé pefái Taitasin tiamikharé ékuyan mai ma séi siamikáeruna avúavasí uren nái séi ída siyave van é uno. Mai fara vara seyo, Taitasi ano yeren tenti vaya van puran tikha ono sen mino. ¹⁵Taitasi ma sireti vaonafá oríka ma avinantán má béin e avire mo kauráke ma ven oo yaiiyiyá eona van béis moékantái arunan uantiany mino. ¹⁶Máan tiyain nan mi sireti ankan nan moéke kama avúavasí inono se mumunan iyáké timusin uantiyá uno.

Tiretií Ankan Aúkákesá Avarí Ono

8 ¹^fMumunan tiyofi sifá tiváeyan noe, Tiyarafenu ano ma Masédoniáke monó kéká ma sarisari uren aya ukhá ein onano van muno. ²Betí ankan amaniná kákan uman uron afoká íkan minó dana san o afasí iyáken mifo mai van betí ankan ída inina mai ma ona ída van ma o afasí iyain kéká ameno siren amusin má kokhon moní átaru en mino. ³Mai ma átaru ein moní betíi anunu finté nái máá yákaren nafi mai máá me khaúdú en mifo mai esantaren moéken karúden mino. ⁴Máan tiyáken inká setin nan áesí Yerusalemí ma vain mumunan kéká bá dere aya ono siren ákonaen tútúpiyaren mino. ⁵Máan tiyaren mifo esé daná betiyan Bafan amiren inká betíi ará tetin timiren mi mai ma Bafan mano vetin amein inin ánain bákuren tétin timiyan mino. Betí ankan ída kanaéen baranten mino siré inikháeruna avúavá esantaren moékan avúavá variyan mino. ⁶Pefái Taitasi ano ena nanin banta ma ayae kama yaná amin dorarí ono van tiretin ará ákona uantaya yókareya afová ukhe nái véi evaránen o váké dóan kípano van mi ákonaé tiyá uno. ⁷^gTiretií ankan ara ara yoran ma variyaonafin kama iya ono. Tiretií ankan Tiyarafenurá mumunan iyákeya ída feran kasaé mai ma mumunan iyaona avúavá tian

^f 8:1 Rom 15:26; 2Ko 9:1-2 ^g 8:7 1Ko 16:1-2

amá iya ono. Inká tiretí ankanpin kokhon afova vakaya Tiyarafenui yorarí ono van moéke anunu iyákeya setin nan iniya ono. Máan mana e vá ena ma amin avúavápin ná tiretí ankan moékantasá dorano.

⁸Téin too yaiye mai yorari ono vara yuvuniya rauno. Ída ino. Ena nanin banta ano ma mai yorarí ono siráken ma iniyain nan mi saretí ankan ma ena avábá uantan avúavá purase aní ono van muno. ^{9^h}Mai fara vara seyo, saretí ankan pefái setisi Bafan Yisas Karaisini sarisari in avúavá onta ono. Béi ma inarufá báken maen minó danái yan baren mifo saretin naron tiren ona ída van banta an den mino. Mai ma inarufá bain danasinta varano van mi máan ten mino.

¹⁰Tiretí ankan ma moní átaruin dorarí ukhá eona fákena sesi inin máan mi ukhen mino. Maman ma esantein oranafin tiretí ankan mai yoran araí urákeya mai yorarí ono van anunu iya ono. ¹¹Máan tiya ompo mai yoran ná e yore mo kípano. Pefá tiretin ará ano mai yorarí ono siren mantakhen mifo sreti ma yákanona avúaváká tiya vá ameno. ^{12ⁱ}Para vara seyo, Tiyarafenu ano inte yanasá tiretí ankan dákefo mai aúkáké ma amin nan mi amusin ukhen mifo ída ma vain dana san ída inikhen mino.

¹³Tiretí ankan mana mai uman baresin ena nanin banta ano avábaká banu vara ma vaya siya rauno. Ída ino. Minó ano manaí ukhein uman barano van mi siyá uno. ¹⁴Taréa saretí ankan kokhon daná kaen nan bái kasa eya vetin aya ukhá esin ná inká anona sreti ma o afasí inona yamú anona aya ino. Máan ma inte mae minó ano manaí ukhe van nono. ¹⁵Mai van ma Tiyarafenui vompon dókifin máa sikhen mino.

“Kokhon dunan ma átaru uan kaé iyain kéká ano ída esantaren kai é iyan mino. Inká manáa yunan ma átaru é iyain kéká ano ída o afasí é iyan mino.”

Eks 16:18

Taitasin Ma Siantan Koriní Orein Baya Ino

¹⁶Téi ma saretin nan iniyarunaí en ma Tiyarafenu ano Taitasin inin iniyain nan mi Tiyarafenun tusu sian tiyá uno. ¹⁷Tiretí ankan baonafá orino siré tetí tiantékun eyo sikharen mifo véi yere orivé mai yorarí ono siren moékantá anunu iyaren pasen mi vei anunu finté tiretí baonafá orinten mino. ¹⁸Tetí ankan ena sifá tiváen má deren Taitasin má tiantékun orinten mino. Tiyarafenui kama vaya ma véi siamiyain nan mi monó nanin banta ano véin amo sé iyan mino. ¹⁹Mai avúavá máa rasa ino. Monó kéká ano ven ma sá moní ma átaru uádan baren Yerusamí orino sikhen mino. Tetí ankan mai yorarí Tiyarafenu aví moékantá daní iyáké inká tetí ankan mai yorarí ono van inikhé uno vá té banasi aní ono. ²⁰Mai ma átaru uran moní baré Yerusalemí oronunafin ída mo asuse urékun mana ano namu ineine ino van mi mai sifátiváen má aviré uno.

^h 8:9 Mat 8:20; Fir 2:6-7 ⁱ 8:12 Mak 12:43-44

²¹Para vara seyo, setí ankan puntákein avúavasí ó tifanté umpo ída vá Tiyarafenun avorá ana kama avúavasi ono van iyáké banasi avorá basá máan ó tifano.

²²Máan tukhá ena sifátiváen má békantáí muntaré tianté kun oren mino. Kokhon damú ara ara yorampin béin akhen ókha ékun ákona yoraríí oné uno. Béi fura sen tiretin nan kama avúavasí anan inono sen afová ukhen pasen béis mai yorarí ono siren kákantá anunu ukharen mino. ²³Máan tukhen mifo manáa ano ma Taitasin nan ma ina intiya mae siamiyákeya senti mana yoran bantan báken tiretin ayaé iyan mino vá teno. Ena sifá tiváe kan maen ena akhen pákena vantá kan mi o varen monó dorarí iyáken Karaisin kákan bí amiyain mino vá te siameno. ^{24^j}Máan tukhein nará tiretimpin ma kama avúavá bain ná míkan banta rasá aní ono. Máan tesin ná tiretimpin ma ará amin avúavá bain minó nanin banta ano afová uren ná pura ino sen onano.

Yerusalemí Ma Vain Monó Nanin Banta Ano Ma Moní Átaru Ein Baya Ino

9 ^{1^k}Téi ída kanaé Tiyarafenui vanasi ma aya iyaona fákena van tenté uno. ²Mai fara vara seyo, saretí ankan ma amusin má ma ena nanin banta aya iyaona avúavá téi afova ukhé pasé Masédoniá kayo avorá tiretin amo sé iyá uno. Tireti Akaiá barafin ma vaona kayo van pe o útúben maman oranafin mi mai yorarí ono siren útakhen mino sé tiámé uno. Tireti ankan ma ará bá ena amin avúavasí eona ano vetí ankan ará mantan nan pasen betí deren mai yorarí ono van en mino. ³Máan tiyan mifo saretí ankan amo sin bayá ma siyá eruna van banasi ano inirene ída aniana ino van muno. Mai ma siameruna yanásinta útakhe fono van mi mái kanan banta ano onano van tianté kun oren mino. ⁴Mai fara vara seyo, Masédoniáké ma manáa kéká ano sen má oriyaren o onanti ma ída útakharé esí maé mai setí ankan tiyave van éku mae saretí moéke ayave van inono. ⁵Mai van mi iniré pe o útúbé tifá tiváeyan tianté kun oren mo aya inti mai ma monó kéká amusin ameno van ma iyáanten nan baré ein danasinta útan kaono van muno. Téi ará bá ma amin amusin nan mi inikhé umpo enai yuvuntá ma amin amusin nan ída siyá uno.

Danayun Pafasintá Ma Sian Baeran Baya Ino

^{6^l}Tireti ankan afovasá ono. Tanáa yanayun ma fafa sikhareya sanáa yunan mi yuyasin nompo kokhon danayun ma fafa sikhareya kokhon dunan mi yuyasin nono. ⁷Máan tukhantiya mana mana vanta ma ona ameno van inteya ovare me inídeya vá ameno. Ída vá enai yuvuntá ameno. Mai fara vara seyo, ará bá ma amin nanin banta van mi

^j 8:24 2Ko 7:13-14 ^k 9:1 2Ko 8:1-7 ^l 9:6 Pro 11:24-25

Tiyarafenu ano anunu é iyan mino. ⁸Máan ma esin Tiyarafenu ano éi ma iniyaona yanasantá víkaantádantiya fase onesin kokhon danasinta vanti kasaé ena nanin banta avarí inono. ⁹Mai van Tiyarafenui vompon dóki ano máa sikhen mino.

“Bé ve ina yanasantafó ona ída vain nanin bantafin amusin dan orera en mino.

Beni funtákein avúavúa ano fara van oriyan banten mino.”

Íbo 112:9

¹⁰^mMáan tukhan Tiyarafenu anon danayun amiren inká béis anan ara ara yunan amé iyan mino. Máan manan en minó danasinta amintiya maifó ena nanin banta aya iyasin pasen mana vanta ano ma kokhon danayun pafa siráken ma kokhon dunan duyasiyainí eya funtákein avúavá kayo varan nono. ¹¹ⁿMáan tesin Tiyarafenu ano kokhon danasinta amintiya mae maifó máan mana eya ena nanin banta aya inono. Máan tukhantiya mai yanasantá mamare mae ona van ma o afasí iyain kéká amesin mi vetí ankan mai avúava san moékantá Tiyarafenun tusu siantanten mino.

¹²Máan tinten mifo saretí ankan ma varanona yoran manon Tiyarafenun moékantá tusu siantanten mino. ¹³Máan te ma ena amin avúavá anoi Tiyarafenu aví daní inono. Para vara seyo, éini moéken amin avúavá anón mi anén Yisas Karaisini Kama Vaya yakhafiya ne sinten mino. ¹⁴Máan tesin maen mai nanin banta ano Tiyarafenui sarisari ma vetí ankampin bíkakhein nan tiretin moéken anunu uren Tiyarafenu ano saretin kama ino van amúkuantanten mino. ¹⁵Máan tukhantí Tiyarafenu ma moékan kama ukhein amusin daná ma simikhein nará tusu sé tifano.

Pori Ma Monó Dorarí Iyáken Mai Yoran Ma Ákona Ein Baya Ino

10 ¹^oTiretí banasi ano séi nan tiyáke Pori ma setin má báken maen perian baren ma enafá o van mi ákona vayafó bompon uvaman timiya ne siya ompo Karaisi ma einí éi seyan bararasí uré bempáké bákéi saretin tiamiyá uno. ²^pTe ma iniyaruna ída mai ano kanaí inten mifo intéa kéka sará bara ráke avúavá bariyan ne siyan nafi mai kékápin ída ákona é baya seno van muno. ³Pura ino. Tetí ankan ma varará bá umps ma vara ráke nanin banta ano ma siruveini sa iyá tife rauno. Ída ino. ⁴^qÍda ma vara ráke aruvín danasinta ifo inaru fáke Tiyarafenui ákona aruvín danasinta fóí Ban Anoni ákona yafu ankaman mágariyá tiféuno. ⁵Mai aruvín danasinta fóí Tiyarafenui kama avúavá ma vanasi ano afová ono sein ma iyákaré ein aruan mágariyá tiféuno. Inká mai aruvín danasantafó anan betíi átakharéin ineine ma vá ein do maman karúdaréi Karaisin oo yaiyino van afova amiyá

^m 9:10 Ais 55:10 ⁿ 9:11 2Ko 1:11; 4:15 ^o 10:1 1Ko 2:3 ^p 10:2 1Ko 4:21 ^q 10:4 Efe 6:13-17

tiféuno. ⁶Máan tukhantin intéa kéká anó iniren dakhafiyantin ná inká intéa kéká anó mai ánan ída yakhafinten nafi mai kékái uman amenté uno.

⁷Tiretí ankan afoká ma vain danasintarai ineine kaiya ono. Mana ano ma Yisas Karaisini vantán bá uno ma sinten ná mai setin má deren Yisas Karaisini vantán bá tifé umpsí ovaren ná me inino. ⁸'Para vara seyo, saretíi mumunan ákona uantano van mi Bafan mano mai yoran timikhantí pasé ída saretíi mumunan mágde asuse onté uno. Máan tukhanti mai yorantá ma seti siví daní onté ída siyave van ó tifanté uno. ⁹Máan tukhantíi sesi vompon pöké tiretin ída akhokho amiran muno. ¹⁰Para vara seyo, manáa ano siyáken Porini vompon mano setin ákonará duvun iyan mifo seti varunará mai vempáké tiyan mino. Máan tukhan maen beni vaya mai ída ákona ukhen mino. ¹¹Máan baya ma siyain kéká ano vá ovaren me afová ino. Mai ma enafá báké ma vompompin uvaman amikharé eruna mai saretin má ma e váké mai avúavú anan baranté uno.

¹²Máan tukhantí manáa kéká ano ma ve amo siren be aví daní é iyainí ída onté uno. Inká tetisi sivútivá bá betin avúavábá manaí ukhen ne ída senté uno. Ída ino. Mai kéká maen betiyantái enai avúavá óden betíi avúavá daimen non mifo mai kékápin ída fura afova van mino. ¹³^sMáan tukhantí tetisi sivútivá ída maman dani uré tetimpin ákona van mino sé tifantéuno. Tiyarafenu ano ma setin timikhain doran máarái seti simo siré mai máá anan doriyáké bái ma mai avúavakasá daimono ma sikhein máará anan daimonté umpsí Tiyarafenu ano ma iniádan baré einí eya saretin mái mai yorampin baono. ¹⁴Máan tukhein nan mi ída moéké teti simo siyá umpsí mai ma Tiyarafenu ano simikhain kanarái sé teti simo siyá uno. Mai fara vara seyo, setí ankan naren araié Yisas Karasini Kama Vaya saretimpin baré orikharé uno. ¹⁵Máan tukhá ena ano ma yókeintá ída seti siví maman daní iyá uno. Tiyarafenu ano ma simikhain doran puntádé doré kun mai ano saretí ankani mumunan ákona uantantin tetisi yoran mano saretimpin mo kokhoní ino van muno. ¹⁶Máan intí maé tiretin oyampá ban ma ída yoriyain baru kayo fimpá bá orivé dorano van muno. Para vara seyo, ena ano ma fefá dókein baru kayofin dódó te simo sira rauno. Ída ino. ¹⁷^tMai van Bompon dóki ano máá sikhen mino. "Banta ano ma mana vanta amo seno vará Bafan mano ma yókein nará amusin uren ben mana vá amo sino." ¹⁸^{Yer 9:24} ¹⁸"Para vara seyo, vanta ano ma amusin iyáken beyan amo sé iyain kéká maen Bafan avorá mai kayo ída kákaní ukhen mifo véi ano ma mana vanta kákan bí amé iyain banta anon kákan bí baré iyan mino.

Porin Má Kampun Aposeri Kayo Vái Vaya Ino

11 ¹Téi ma fara aniana vaya siyá báké ma se simo siyákuya mai ída vá me ifá ono. Tirun mompo mai ma aniana vaya ma siyaruna

^r 10:8 2Ko 13:10 ^s 10:13 Rom 12:3 ^t 10:17 1Ko 1:31 ^u 10:18 1Ko 4:4

vá ineno. ²^vMai fara vara séi saretí ankan nan kokhon ineine iya rauno. Tiyarafenu ano yeren kokhon ineine iyái mai van mi vanta amikhein arinta ano ma ákona en bainí ukheya Karaisin má bano van mi siamiyá uno. ³^wMáan tukhen mifofefá ma osafáe ano Ivin ma mákasikharé einén Ban Anon mano saretí inin máden asuse intiya mai ma funtáde Karaisin ánain dakhifiyá inona me ifá ure kampun avúavápó béin dakhafinona van mi iniyá uno. ⁴^xPara vara seyo, saretí ankan ma onékuya enará ukhein Yisasin má Kantá Aunan má monó baya vá pákena van ma ena kéká ano me siyákaya mae saretí ankan kasaemumunan iya ono. ⁵^yMáan tiya ompo setí ankan kama uron mi iyá uno ma siyain aposeri kayoi aránaópá téi ída vá uno. ⁶^zMáan tukhéi vanasifin ma sánaen monó baya sin afova ída manté umpsí fura sé betin esantaréi afová ukhé uno. Mai afova fefái ara ara aa sáké tiretí ankan aní ékuya fura se afováí ukha ono.

⁷^aMáan tukha ompo séi ma seyan bararasí uré tireti vaípáke ma ída miyan inantinton Tiyarafenu Kama Vaya ma siamiyaruna mai umesá iya rafuno. Ída ino. ⁸^bTiretí ankan ma fara aya ono siré ena monó kéká ano ma karúdarú uádan pintena moní ma variyaruna anoi umoyaní ma einí iyá uno. ⁹Máan tukhantí saretí ankan baonafá ma o varé maé mana yana san ma o afasí ma é ída sreti vaonafá inan té iyá uno. Mai fara vara seyo, Masédoniáké ma erein tifá tiváeyan mano mai ma o afasí iyá eruna yanasinta simikhantí pasé téi ída kanaié tireti siya ono van mana yana san inan tenté uno. Ída uron mi máan tonté uno. ¹⁰Téi fura sé afová ukhékun Karaisini fura yaná ano sempin bantí pasé mai ma ída miyan bariyaruna van Akaiá barafin ma minó akhempá nöké mai van kasaé te simo senté uno. ¹¹Mai séi fará tireti vaonafá mana yana san ída inantiya rafuno. Téi ídá tiretin nan tinunu é iya rafuno. Tiyarafenu ano afová ukhái séi fura siré tireti nan moeké tinunu iyá uno. ¹²Máan tiyái mai ma setin má manaí dorarí iyá uno siren ma vetiyan amo siyain kékái aa yasíkano van pasé para máan tiyá banté uno. ¹³Mai kéká maen kampun doran banta kayo ino. Betíi avúavá ano sretin auráraké uren Yisasin kama yoran banta ma einí é iyan mifo ída ino. ¹⁴Máan tiyan mifo séi ída sinú diyá uno. Para vara seyo, Ban Anon mano yere kasaen kakhan enisorí ma einí iyan mino. ¹⁵Máan tukhantya Van Anoni yoran kéká ano ma ara ara avúavá pólé ma vanasi mákáden ma vetiyan nan puntákein kéká uno ma sin nain nan tiretí ankan ída vá anú duman duman iya vá baro. Ínaimpáké betí ankan ma variyá inain avúavákái miyan baranten mino.

Porin Amaniná Ma Eriyain Uman Kayo Van Ma Sein Baya Ino

¹⁶Mai ma fefá tiamikharé eruna mai vaya anan taréa evaráné tiamiyá uno. Mana vanta ano sen nan ída vá óen iya ne sin nompo séi ma manáá

^v 11:2 Efe 5:26-27 ^w 11:3 Esé 3:4, 13 ^x 11:4 Kar 1:8-9 ^y 11:5 1Ko 15:10; 2Ko 12:11

^z 11:6 1Ko 2:1, 13 ^a 11:7 1Ko 9:18 ^b 11:8-9 2Ko 12:13; Fir 4:15-16

aniana vaya ma siyákeya mai kampun banta kayoi vaya ma iniyaonaí eya senti vaya inesí maé manáará te simo seno van muno. ¹⁷Au khakan in avúava san Bafan mano ída anunu ukhen mifo séi maen óen banta an mi iyíá uno. ¹⁸Máan tukhein nan mi kokhon nanin banta ano ma vara ráke avúavápin au khakan inté intí maé mai sen mái máan tonté uno. ¹⁹Máan tukhein nan mi intéa kéká anó mai van afová ukhé uno siyafó mai kéká ano óen kayo an mi yiya ono. ²⁰Máan tukhein nan mi mana vanta ano ma veni yorarí ono van duvun en nafi áa siretin nina yanásinta varen nafi áa siretin máká maáká en nafi inká tiretin maman bararasí uren beyan nan mana inian kákaní iyáken inká tiretin auná ma ankamen ma intiya mai sretí ankan ída mana avúavasí ukha ompo ifá en nan mi máan tiyan mino. ²¹^cMáan tukhá téi siyave van ída kanaí é tiyáké tetimpin ída ákona vain mai yanásí ontere senté umpo vetí ankampin ákona van mi máan tiyan ne senté uno.

Betiyan ma inte yanápin nafi ma ve amo sintí maé mai seyan dere se simo senté umpo mai evaráné óen banta an mi yanté uno. ²²Máan tukhantin betí ankan Iburu kéká unó tinten nafi mai sen má Iburu vanta uno. Inká betí ankan Isarerí kéká unó tinten nafi mai sen má Isarerí vanta uno. Inká betí ankan Abraamun anavasin munó tinten nafi mai sen má ben anavasin muno. ²³^dMai kéká ano Karaisini yoran banta uno sé iyan mifo séi mana óen banta an ma yiyrána anoi vetí ankan esantaré moékantá Karaisini yorarí iyá uno. Téin karavusifin pákaan moren ída yankaforen dádá dafiyó tinkáden tiruan purirí é iyan mifo séi moékantá ákona yorarí é iyá uno. ²⁴^eYutan kéká ano yan manápá damúpin teti naini (39) yádái ákona yafiyópó tinkádú ukhen mino. ²⁵^fKanú manaú dádasí en Romu kéká ano kunan dafiyópó tinkamen mino. Maná damú Yutan kéká ano onámanápó tinkamen mino. Inká kanú manaú dádá téi ma oreruna sipi namuein mino. Máan tuví mana inuran má bayan má un non daró noré uno. ²⁶^gMáan tukhá kokhon dádá minópimpá ma nöké anon nonpim e iyankarí iyákun inká umoyan banta kayo ano siruren ten tina yanásinta yafiyaren mino. Inká ena anan nanin banta vá tesí kéká bá ano yere sirono van iyaren mino. Kákan baru kayofin nafi kámá barafa safi uman baré ída kama iyáre uno. Un nompin afeyorarí é iyákun inká kampun ten monó kéká uno ma siyain kayo ano uman timiyan mino. ²⁷Máan tukhái séi kokhon damú ákona yorarí iyá paséi ída kamaé tuun baré iyá uno. Kokhon damú ída non má dunan má nanton tirafanan para e manté oré iyá uno. Ída ona vaká pasé iyon nan takhin takhin é iyá uno. ²⁸Máan tiyá maé monó nanin banta ano intesá ena ena uman kayo varanten nafi siré anomé iné iyá uno. ²⁹Manáa monó kékái mumunampin

^c 11:21-22 Fir 3:5 ^d 11:23 Apo 16:23 ^e 11:24 Diu 25:3 ^f 11:25 Apo 16:22; 14:19

^g 11:26 Apo 9:23; 14:5

ma mo iyon in maen ten tufá ída mímú é iyan mino. Manáa kéká ma umefin mamádan eraven ankamí maé tiran nan uantiyá uno.

³⁰Máan tukhantí te simo ma seno vará inte yanásinta anó tenti sivesara aní iyan nafi mai vará moékantá te simo seno van muno. ³¹Mai ma ena ena aví daní iyain Tetisi Bafan Yisas Karaisin Afóe Tiyarafenu ano afová ukhái ma fura vayan tiamiyá uno. ³²^hTéi ma Damaskásí bákun maen Aretasin ne sin Kin ni kamanin banta kayo ano séi nan pákano siren aruvín banta kayo kaíkan kákan baru ona kaylorá dafisen orikharen mino. ³³Máan tukharen mifo kákan barui kafi aimpinté uaren téin unampin uféden kaí aravuaré me oné karan oré uno.

Pori Ma Ayankuní Ukhein Daná Aní In Onein Baya Ino

12 ¹Te siví ma yaní in pintena ída mana yaná baranté umpsí ída ena aa vain pasé mai avúavá para varé oriyá banté uno. Máan tiyá banté umpsí áesí Bafan mano ma séin tuu vaéden ma aní ein danasinta vá inká aú páke yanásinta vá tiaméku vá ineno. ²⁻³Téi Yisas Karaisini yoran bantan baré ékun Tiyarafenu ano e siviren dan uron inarufá módá bákun fotini (14) oranan orikhen mino. Mai sen tu minó bukhafa anó o van nafi áa saunan máa anó o van nafi mai séi ída afová ukhái umpsí Tiyarafenu ano anan afová ukhen mino. ⁴Téin ma siviren inaru varufin ma moráká maé téi sinú duré mai ma enará ukhein baya ma ineruna van ída kanaí é baya seren é uno. ⁵Mai vaya ma inikherunará te simo senté umpsí mai van ifá iyá umpsí mai ma sesi ákona ma ída vain nan manan te siví daní onté uno. ⁶Te siví ma yaní onté maé mai fura vaya anan tenté umpsí ída óen banta an danté uno. Máan tonunaren mifo ifá é uno. Mai fara vara seyo, vanasi ano senti vayará ten tiví daní uren tenti ineine ánain dakhafin nain nan paséi se ma variyaruna avúavá bá inká te ma siyaruna vaya vá inen onen ma uren maen ten nan puran tiyan mino sen inino van muno.

^{7ⁱ}Tiyarafenu ano kama yanásinta séin aní uren maen inká téin nan mai yanásinta van ovaren me iniren be aví daní inae siaren mana ayankun an dakhein daná áíkan ten tufin dafékakhen mino. Mai yaná maen mai Ban Anoni vaya varen orin bantan tiantan e váken mi séin nan be aví daní inae siren iyariyan ban mino. ⁸Máan tiyáká mai yaná do maman karúdasintano van kanu manaú dádái simúkimpói Bafan baípá ínané inantiyaré uno. ^{9^j}Máan tékun maen bái evaránen tisimemí, “Éin an den ma ákona ída vain nanin bantafin mi senti sarisari ano kama yorarí iyáken mai sarisari ano éimpin kanaí ukhen mino,” sen tisimikhá paséi senti ákona ma ída vain nan mi se siví daní iyákun maen Yisas Karaisini ákona ano sen pinté uaren doriyan mino. ¹⁰Máan tukhein nan mi Yisas

^h 11:32-33 Apo 9:23-25 ⁱ 12:7 Yop 2:6 ^j 12:9 Fir 4:11-13

Karaisiní yorarí impin ma ída senti ákona vantin ma vanasi ano siruren tisire toyampá bayá siyá ma kákan uman bariyaruna van mi simusin iyá uno. Para vara seyo, séimpin ma ída ákona van maen mai Yisas Karaisiní sarisari anon téin evaránen ákona simé iyan mino.

Pori Ma Koriní Nanin Banta Van Kokhon Ineine Ein Baya Ino

¹¹^kTiretí ankan manon téin tirá maman mantarenái óen banta an davé te simo siyá uno. Tiretí ano ma séinti sivútvá bayá uvádeya ma séin timo seren mifo saretí ankan ída máan tená paséi seyantá tian dákó é umps mai ma aví bain aposeri kayo aránaópá ída séi vá umps séi faen danái vá uno. ¹²^lTéi ma saretin aúbaná ma o váké maé ten nan purase aposeri ino seno van kokhon danái variyaré uno. Para vara seyo, séi nan Tiyarafenu yoraríi iyan mino seja afová ono van paséi mantaan ákona uvé minó uman bariyáké maé inká enará ukhein danasinta vá aní danasinta vá maman dákó ukharé uno. ¹³^mEna monó namun kayofin ma monó tiyain nanin banta ma maman tiyaruna avúavá anan tiretin manan té umps mana uman máan ída amé uno. Téin dunan timin uman ma ída ameruna ano ma namu ukhéku maeya mai ume vá ampisintano.

¹⁴Kanú manaú dádasí é tiretí ankan baonafá orono van útakhé umps mai ma oronunafin ída saretin uman amenté uno. Tiretí afová ukharono. Iyampon kayo ano ída yunan dosen be anoifon mo amé iyan mifo vetin anoifo anon dunan dosen be akhafana mo amé iyan mino. Máan tukhein nan mi saretíi minó daná barano vara oronte raumpo saretin nan mi oronté uno. ¹⁵Minó te sina yanasinta vá te su vá tiretí ankan ameno van moéké tinunú iyá umps saretí ankan téin nan ída anunu iya ono.

¹⁶Tiretin pinté manáa ano sen nan ída uman timiyan ne siren maen máa siyan mino. “Teti sina yanasinta ída afoká umoyan iyan mifo ara ara vaya kayofó tetin mákáden maen aupáké baré iyan mino.” ¹⁷Mai intesá ukhen nafino. Mai ma siantékun orein banta kayo ayan táké uaresá tiretin nina yaná umoyan bare rafuno. ¹⁸ⁿTiretí ankan baípá ma Taitasin tiantékun oriyá maé ena sivá tiváen tékun ben má muntaven oren mifo Taitasi ano saretin nina yaná mákáden ná umoyan baren nafino. Ída ino. Para vara seyo, verasampin mana Aunan mi vaká mana aasái oriyá manaí doraríi iyá uno.

¹⁹Tetiyán aúpasí ono vara ma vompon uvaman ame rauno. Ída ino. Tetiyán ankan Karaisiní yoran banta kékái váké Tiyarafenu avorá pura vayan tiyá umps séi ma sinunu ukheruna sirona kéka soe, saretíi mumunan maman ákona uantano van mi ma vaya siyá uno. ²⁰Para vara seyo, séi ma oriyá o onéku maeya séi ma inikheruna avúaváká ma ída vare ma inká tireti ma inikheona avúaváká ída séin tonanona van mi feriyá uno.

^k 12:11 2Ko 11:5 ^l 12:12 Rom 15:19 ^m 12:13 2Ko 11:9 ⁿ 12:18 2Ko 8:6, 16-18

Téi ma o oné kun ma aruve asive in nafi ena ará namu uantan nafi ena aranan uantan nafi eyan nan mana inin avúava safi oyampá baya sin nafi e sian more mere in nafi au khákan in avúava safi asuse avúava safi ma van nan mi feriyá uno. ²¹^pPara vara seyo, gefá ma umeí iyá éona van ída ará baédeya sirun noe sen nan ma famúku avúava safi inká ena aranan avúava safi ma siretempin para vain ma mo oné kun ma Tiyarafenu ano siyave simin nain nan mi feri yá uno.

Pori Ma Sipá Ákona Uanten Amaan Baya Sein Mino

13 ¹^pKanú manaú dádasí é tiretí ankan baonafá oronté umpo Tiyarafenui vompon dóki ano máa sikhen mino. “Kan nafi kanú manaú banta ano fi ma onantin ma mana vanta ano aauí ukhá inti mae kasaé mai vaya kópin puntaran nono.” ^{Diu 19:15}

²Pefá ma kan dádasí é ma saretin má báké maé mai ma umeí ukhá ein kayo gefái afova vaya siamikharé uno. Máan tukharéi saréa ma vompon ma uvaman amerunafin dere evaráné mai ma umeí ukhá ein kayo vá ena kéká bá afova vaya siameruna fasintí téi ma oronté mai ma umeí iyáin nain kéká ída avo uantanté uno. ³Máan ma ékuyan tireti afová eya Karaisi anon ben pinté uaren baya sisimiyan mino sinono. Tiretii avúavá ma maman puntarampin béin ída afonkakhein pasen bei kákan ákona fói saretimpin doranten mino. ⁴^qPara vara seyo, gefá bémimpin pura sen ída ákona van maen daa unkamádantá arukharen mifo saréa Tiyarafenui kákan ákonarái van mino. Máan tukhan tetin má deren ída ákona van mifo véin má ma súpá ukheruna van mi Tiyarafenui ákona ano setimpin báken mi mai ákona ano saretimpin doriyan mino.

⁵Ena ena yamú ákonaé mumunan iya rafuno sire vá e avúavá bá ineine vá daíde vá onano. Eyan avádúan onesin ma Karaisi ma ída saretimpin banti maeya mai fura se ída mumunan ukha ono. ⁶Máan tiyákeyan teti ma Karaisini yorarí iyaruna oman afová inono sé inikhé uno. ⁷Tiyarafenu ano saretin ayaintiya ída namu avúavá barano van mi setí ankan timúkiyá umpo setin nan Karaisini yoran banta kéká ino sen banasifin tino varau. Ída ino. Para vara seyo, seti nan kampun banta kéká ino siya ompo setinti kákan inin ma vain mai funtákein avúavá ana varano van muno. ⁸Para vara seyo, setí ankan ída kanaí é pura yaná namuroí ó tifanté umpo mai yanákai mantakhé pasé mai yanái ayaiyá tifé uno. ⁹Tetimpin ma ída ákona van ma saretimpin ákona vain nan mi simusin iyáké Tiyarafenu ano saretin ayaintiya ákona mumunan má bano van timúkiyá uno. ¹⁰^sBafan mano vei yorantá dafisino van mi séin aní uren ákona simikhá doriyákéi saretin má ma ída varuna afokhampin

^o 12:21 2Ko 13:2 ^p 13:1 Mat 18:16; 1Ti 5:19 ^q 13:4 Fir 2:7-8 ^r 13:5 1Ko 11:28

^s 13:10 2Ko 10:8

ma vompon uvamádékun oren mino. Mai fara vara seyo, séi ma oronté maé ída ákona vayafó tiretin má baya seno van muno. Tiretin máden asuse ino vara Bafan mano mai ákona simikhen naifo siretin ayaintiya mumunan ono van mi simikhen mino.

Pori Ma Amusin Ein Baya Ino

¹¹ Mumunan tiyofi sifá tiváeyan noe, sesi vaya mará me akhení iyá tusu sé umpo senti kípan baya vá inero. Tiretíi namu avúavá ampireya vá ben ákona uantan maran iya vá amusin iyáke inká manafin báke vá ará kusin avúavá baresin ná avábá uren ma ará kusiantan Tiyarafenu ano siretin má bano.

¹² Tiyarafenurá ma monó tiyain nanin banta ano ma avábá iyain avúavá kasá ben avábá in maran ná ono.^t ¹³ Tiyarafenui kantasí ukhein nanin banta ano amusin baya ne siádan oren mino.

¹⁴ Bafan Yisas Karaisini sarisari vá Tiyarafenui avábá bá Kantá Aunani manafin ban avúavá bá ano vá tiretin má bano.

^t **13.12** Kiriki vaya fintéi *Tiyarafenurá ma monó tiyain nanin banta ano ma kantasí ukhein amónan maran iyain* nan mi sikhen mino.